



Pranuar / Dorezuar Prilimeno/Prodato Received/Delivery	27.06.2022	2	viti god year
Organ /Njesia Organ /Jednica Org /Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKOMSHCK	3758/2022		1/4

## Republika e Kosovës

### Republika Kosova – Republic of Kosovo

#### KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS NEZAVISNI NADZORNI ODBOR CIVILNE SLUŽBE KOSOVA INDEPENDENT OVERSIGHT BOARD FOR THE CIVIL SERVICE OF KOSOVO

A.nr.117/2019

**Këshilli i Pavarur Mbikëqyrës për Shërbimin Civil të Kosovës** – Kolegji për shqyrtimin e ankesave në përbërje nga: Malsore Gashi Bajraktari-kryetare, Eshref Shabani dhe Jeton Koca-anëtar dhe Valentina Kaçandolli Bekteshi-Zyrtare e Lartë për Bashkëpunim Profesional, bazuar në Aktgjykimin A.nr.1181/2019 të datës 23.05.2022 të Gjykatës Themelore në Prishtinë/Departamenti për Çështje Administrative, kanë shqyrtuar ankesën me numër A.nr.117/2019 të datës 20.02.2019 e parashtruar nga ankuesja kundër Vendimit me numër 04-052-159 të datës 01.02.2019 të Komisionit për Zgjidhjen e Kontesteve dhe të Ankesave të Agjencisë së Statistikave të Kosovës, në çështjen juridike “kontestim konkursi”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosies së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 24.06.2022, mori këtë:

### V E N D I M

**PEZULLOHET** procedura administrative e filluar sipas ankesës me numër A.nr.117/2019 e datës 20.02.2019, e parashtruar nga ankuesja

### A r s y e t i m

Agjencia e Statistikave të Kosovës në bazë të autorizimit të datës 11.09.2018 të lëshuar nga Ministria e Administratës Publike/Departamenti të Administrimit të Shërbimit Civil, me datë 13.09.2018 ka shpallur konkursin për vendin e punës “Zyrtar për Statistika të Investimeve”, ASK-DSE-008. Në këtë konkurs ka aplikuar edhe ankuesja e cili është ftuar të marrë pjesë në fazat e procedurës së rekrutimit (testin me shkrim dhe me gojë) dhe sipas renditjes përfundimtare të kandidatëve (Form.MAP-SHCK-10) ankuesja është renditur e para në listën e kandidateve me 92.23 pikë.

Kryeshefi Ekzekutiv i Agjencisë të Statistikave të Kosovës, me datë 19.12.2018 merr vendimin me numër 04-052-2028 me të cilin vendim e anulon raportin e rekomandimit të datës 25.10.2018 nga Komisioni Përzgjedhës i Rekrutimit për kandidaten e suksesshme për pozitën “Zyrtare për Statistika të Investimeve” dhe në dispozitivin e dytë të këtij vendimi në pozitën “Zyrtar për Statistika të Investimeve” emërohet kandidatja Ajshe Zuka e dyta me radhë me vlerësim nga Komisioni Përzgjedhës i Rekrutimit.

Ankuesja kundër vendimit të datës 19.12.2018 të Kryeshefit Ekzekutiv të Agjencisë të Statistikave të Kosovës me datë 11.01.2019 parashtron ankesën me numër të protokollit 04-052-16 në Komisionin për Zgjidhjen e Kontesteve dhe të Ankesave të Agjencisë të Statistikave të Kosovës.

Komisioni për Zgjidhjen e Kontesteve dhe të Ankesave të Agjencisë së Statistikave të Kosovës me datë 01.02.2019 merr vendimin me numër 04-052-159 me të cilin vendim refuzon si të pa bazuar ankesën me numër 04-052-16 të datës 11.01.2019 të parashtruar nga ankuesja

Ankuesja e pa kënaqur me vendimin e datës 01.02.2019 me numër 04-052-159 të Komisionit për Zgjidhjen e Kontesteve dhe të Ankesave të Agjencisë të Statistikave të Kosovës me datë 20.02.2019 parashtron ankesën me numër të protokollit 876/2019 në Këshillin e Pavarur Mbikëqyrës për Shërbimin Civil të Kosovës.

Këshilli i Pavarur Mbikëqyrës për Shërbimin Civil të Kosovës, nga muaji janar i vitit 2019 deri më datë 08.10.2020 ka qenë jo funksional dhe nuk ka vendosur për ankesën e ankueses, ndërsa më datë 17.04.2019, Këshilli i Pavarur Mbikëqyrës për Shërbimin Civil të Kosovës e ka njoftuar ankuesen për arsyet e mos shqyrtimit të ankesës duke udhëzuar që mund të ndiqni procedurat e mëtejme dhe se në pajtim me Ligjin për Konfliktin Administrativ mund të filloni procedurën gjyqësore pranë Gjykatës Themelore në Prishtinë–Departamenti për Çështje Administrative. Ankuesja ka ndjekur procedurat e tjera duke iniciuar konflikt administrativ pranë Gjykatës Themelore në Prishtinë–Departamenti për Çështje Administrative.

Gjykata Themelore në Prishtinë–Departamenti për Çështje Administrative më datë 23.05.2022 ka nxjerr Aktgjykim A.nr.1181/2019 me të cilin ka aprovuar kërkesëpadinë e paditëses duke anuluar njoftimin e Këshillit të Pavarur Mbikëqyrës për Shërbimin Civil të Kosovës të datës 17.04.2019 dhe duke e detyruar Këshillin e Pavarur Mbikëqyrës për Shërbimin Civil të Kosovës që brenda 30 ditësh të vendos për ankesën e datës 20.02.2019. Këshilli i Pavarur Mbikëqyrës për Shërbimin Civil të Kosovës me datë 27.05.2022 me numër të protokollit 3086/2022 e ka pranuar Aktgjykimin A.nr.1181/19 të Gjykatës Themelore në Prishtinë–Departamenti për Çështje Administrative.

Këshilli i Pavarur Mbikëqyrës për Shërbimin Civil të Kosovës, me datë 21.02.2019, ankesën e ankueses e ka proceduar për përgjigje në ankesë tek Agjencia e Statistikave të Kosovës. Agjencia e Statistikave të Kosovës, më datë 25.02.2019 ka përcjell dokumentacionin e kërkuar me shkresat e bashkangjitura të lëndës.

Ankuesja po ashtu me datë 08.06.2022 parashtron prova shtese lidhur me ankesën me numër të protokollit 876/2019 të parashtruar në Këshillin e Pavarur Mbikëqyrës për Shërbimin Civil të Kosovës kundër vendimit me numër 04-052-159 të datës 01.02.2019 të Komisionit për Zgjidhjen e Kontesteve dhe të Ankesave të Agjencionit të Statistikave të Kosovës.

***Kolegji për shqyrtimin dhe vendosjen e ankesave për marrjen e vendimit meritor ka administruar këto prova:*** Aktgjykimi A.nr.1181/19 i datës 23.05.2022 e Gjykatës Themelore në Prishtinë/Departamenti për Çështje Administrative; Njoftimi i datës 17.04.2019; Ankesën e ankueses të datës 20.02.2019 të parashtruar në Këshillin e Pavarur Mbikëqyrës për Shërbimin Civil të Kosovës; Vendimin e datës 01.02.2019 të Komisionit për Zgjidhjen e Kontesteve dhe të Ankesave të Agjencisë të Statistikave të Kosovës; e-mail i datës 14.12.2018; Tabela e kandidatëve me pikë nga lista e ngushtë dhe intervistë e datës 14.12.2018; Vendimi i datës 19.12.2018 i Kryeshefit Ekzekutiv të Agjencisë të Statistikave të Kosovës; Përgjigja nga Agjencia e Kundër Korrupsionit e datës 05.12.2018 me numër 03.02/4332/18 për Kryeshefin Ekzekutiv të Agjencisë të Statistikave të Kosovës; Njoftimi i datës 14.12.2018; Njoftimi i datës 14.12.2018 për kandidatin e suksesshëm; Rendiça përfundimtare e kandidatëve (Form.MAP-SHCK-10); Përmbledhja e vlerësimeve individuale (Form.MAP-SHCK-09); Raporti final i rekomandimit nga Komisioni Rekrutues (Form.MAP-SHCK-11); Lista e ngushtë e datës 12.10.2018; Formulari për të përcaktuar kriteret e zgjidhjes së ngushtë përfundimtare; Regjistri i aplikacioneve të pranuar (Form.MAP-SHCK-04) i datës 13.09.2018 dhe 01.10.2018; Përcaktimi i kriterëve për testimin me shkrim dhe me gojë për vendin e punës për të cilën kërkohet njohja e ndonjë gjuhe të huaj; Përcaktimi i kriterëve për përfshirje në listën e ngushtë (Form.MAP-SHCK-05); Propozimi për emërim i datës 25.10.2018; Vendimi i datës 28.09.2018 për formimin e Komisionit Përzgjedhës të Shërbimit Civil; Deklarata e datës 26.09.2018 e Udhëheqëses së Personelit të Agjencisë të Statistikave të Kosovës; Vendimi i datës 16.10.2018 për zëvendësimin e anëtarit të Komisionit Përzgjedhës të Shërbimit Civil; Autorizimi për publikimin e konkursit i datës 11.09.2018 i lëshuar nga Ministria e Administratës Publike/Departamenti i Administrimit të Shërbimit Civil; Konkursi i datës 13.09.2018; Kërkesa për punësim e datës 27.09.2018 (Form. ZKM/ASK-SHCK-03) e kandidatës me dokumentacionin e bashkangjitur; Kërkesa për punësim e datës 25.09.2018 (Form. ZKM/ASK-

SHCK-03) e kandidates me dokumentacionin e bashkangjitur; Vlerësimi individual i kandidatëve për vendin e punës për të cilin kërkohet njohja e ndonjë gjuhe të huaj (Form.MAP-SHVK-08); Testi me shkrim; Përgjigja në ankesë nga organi i punësimit me shkresat e bashkangjitura të lëndës; Provat shtese për Këshillin e Pavarur Mbikëqyrës për Shërbimin Civil të Kosovës- njoftimi/kërkesa e ankueses e datës 14.06.2022 e parashtruar në Agjencinë Kundër Korrupsion.

Kolegji për shqyrtimin dhe vendosjen e ankesave, për vendosjen e kësaj çështje ka shqyrtuar të gjitha shkresat e lëndës të parashtruara nga palët dhe ka konstatuar se ka bazë të mjaftueshme ligjore si dhe ekzistojnë rrethana të reja të cilat e plotësojnë kushtin që vendimmarrja për lëndën A.nr.117/2019 e datës 20.02.2019 e parashtruar nga ankuesja të **pezullohet, sepse:**

Kolegji për shqyrtimin dhe vendosjen e ankesave, sipas Aktgjykimit me numër A.nr.1181/2019 të Gjykatës Themelore në Prishtinë-Departamenti për Çështje Administrative të datës 23.05.2022 ka shqyrtuar lëndën e ankueses sipas ankesës me numër A.nr.117/2019 të datës 20.02.2019 të parashtruar në Këshillin e Pavarur Mbikëqyrës për Shërbimin Civil të Kosovës, mirëpo për të njëjtin objekt shqyrtimi në Këshillin e Pavarur Mbikëqyrës të Shërbimit Civil të Kosovës, janë pranuar prova shtese lidhur me ankesën me numër të protokollit 876/2019 të parashtruar në Këshillin e Pavarur Mbikëqyrës për Shërbimin Civil të Kosovës kundër vendimit me numër 04-052-159 të datës 01.02.2019 të Komisionit për Zgjidhjen e Kontesteve dhe të Ankesave të Agjencisë të Statistikave të Kosovës, konkretisht ankuesja ka parashtruar kërkesë për Opinion në Agjencinë Kundër Korrupsion lidhur me ekzistimin e mundshëm të konfliktit të interesit me Kryeshefin ekzekutiv të atëhershëm të ASK-së, sepse pasi që është rekomanduar nga Komisioni Përzgjedhës i Rekrutimit si kandidat e suksesshme për pozitën "Zyrtare për Statistika të Investimeve". Kryeshefi Ekzekutiv i Agjencisë të Statistikave të Kosovës, me datë 19.12.2018 merr vendimin me numër 04-052-2028 me të cilin vendim e anulon raportin e rekomandimit të datës 25.10.2018 dhe emëron kandidaten e dyta me radhë me vlerësim nga Komisioni Përzgjedhës i Rekrutimit, sipas Opinioneve zyrtar-rekomandimit të datës 05.12.2018 të Agjencisë Kundër Korrupsionit lidhur me situatën e konfliktit të interesit respektivisht lidhjes familjare të kandidates së përzgjedhur me Kryeshefin Ekzekutiv të ASK-së.

Meqenëse Këshilli i Pavarur Mbikëqyrës i Shërbimit Civil të Kosovës, për të njëjtin çështje ka pranuar prova shtese respektivisht kërkesën e datës 14.06.2022, drejtuar Agjencisë Kundër Korrupsionit nga ankuesja lidhur me ekzistimin e mundshëm të konfliktit të interesit me Kryeshefin ekzekutiv të atëhershëm të ASK-së, dhe përderisa është vërtetuar se kërkesa është duke u trajtuar në Agjencinë Kundër Korrupsionit, Kolegji konstaton se në bazë të dispozitave ligjore të nenit 85 paragrafi 1 të Ligjit Nr.05/L-031 për Procedurën e Përgjithshme Administrative i cili përcakton se: **"Kur organi publik që zhvillon procedurën has në një çështje, zgjidhja e së cilës është parakusht për zgjidhjen e çështjes kryesore dhe e cila përbën një çështje juridike të pavarur (në vijim: "çështje paraprake"), për zgjidhjen e së cilës është kompetente një gjykatë apo organ tjetër, organi publik që zhvillon procedurën do të pezullojë çështjen kryesore, deri sa çështja paraprake të jetë vendosur dhe do të njoftojë palën për vendimin e pezullimit"**, ekzistojnë rrethana të mjaftueshme që shqyrtimi i lëndës A.nr.117/2019 të pezullohet deri në përgjigjen gjegjësisht ofrimin e opinionit zyrtar nga Agjencia Kundër Korrupsion lidhur me shqyrtimin e kërkesës së datës 14.06.2022, të parashtruar nga ankuesja lidhur me ekzistimin e mundshëm të konfliktit të interesit me Kryeshefin ekzekutiv të atëhershëm të ASK-së, pasi që shërben si parakusht për zgjedhjen e çështjes kryesore.

Këshilli i Pavarur Mbikëqyrës i Shërbimit Civil të Kosovës, pas ofrimit të përgjigjes respektivisht opinionit zyrtar nga Agjencia Kundër Korrupsion lidhur me kërkesën e datës 14.06.2022, të parashtruar nga ankuesja me ekzistimin e mundshëm të konfliktit të interesit me Kryeshefin ekzekutiv të atëhershëm të ASK-së, do të vendos edhe për lëndën A.nr.117/2019 të ankueses

Andaj, pas analizimit dhe vlerësimit të gjitha shkresave të lëndës si dhe duke u bazuar nënin 6 paragrafi 1 nën paragrafi 1.1 dhe nënin 18 paragrafi 1 nën paragrafi 1.9 të Ligjit Nr.06/L-048 për

Këshillin e Pavarur Mbiqëqyrës për Shërbimin Civil të Kosovës si dhe nenit 85 Ligjit Nr.05/L-031 për Procedurën e Përgjithshme Administrative, Kolegji vendosi si në dispozitiv të këtij Vendimi.

Vendimi hyn në fuqi në ditën e nënshkrimit nga Kryetarja e Kolegjit

**Këshillë juridike:** Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë – Departamenti Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

**KËSHILLI I PAVARUR MBIQËQYRËS PËR SHËRBIMIN CIVIL TË KOSOVËS**  
**Lënda A.nr.117/2019**

Valentina Kaçandolli Bekteshi

Zyrtare e Lartë për Bashkëpunim Profesional

Malsore Gasirri

Kryetare e Kolegjit



**Vendimi i dërgohet:**

- Ankueses,
- Kryeshefit Ekzekutiv në Agjencinë të Statistikave të Kosovës;
- Udhëheqësit të Personelit në Agjencinë e Statistikave të Kosovës dhe
- Arkivit të KPMSHCK-së.

